

ussiti di Maran 32 boemi con certi animali per pascolarli, par da villani 50 da Porpedo siano stà asaltadi et morti 30 di loro boemi e toltoli li animali. *Item*, domino Theodoro dal Borgo, con li cavallizieri, venendo do barche di farine di Trieste per intrar in Maran, habi presa una, et una altra nel paludo seapolò li homeni, *ut in litteris*.

Di sier Jacomo Badoer luogotenente di la Patria, fo letere, di 6, da Udene, con questi avisi, *ut supra*; ma dize homeni d'arme 250.

Vene in Colegio uno noncio dil Papa, va in Honcaria con brevi per sedar queste differentie di la cruciata etc., nominato domino . . . . da Brignan, homo doto, et fo introdoto per sier Bernardo Bembo dotor et cavalier in Colegio, et usò alcune parole, et datoli quello richiese, e fatoli un presente di certi danari.

190 Da poi disnar fo Pregadi, e prima, lezendo le letere, intrò Consejo di X con la zonta dentro, et poi usiti.

Di campo, fo letere, di questa matina, dil capitano zeneral, di le Brentelle. Come è più sviserato a questo Stato che nui dil Senato, e siamo tardi a mandar a tuor con burchiele le biave dil Polesene. I nimici è al loco solito; unde, per rimover i soi pensieri, consultato con il signor Teodoro Triulzi, hanno terminato da matina, per tempo, levarsi di le Brentelle e metersi in uno alozamento mia uno di Santa †, zoè di Padoa, chiamato Bruzegana, e sarà in mezo, e secondo farano essi inimici si governerà; nè si dubiti di alcuna cosa etc. *Item*, il provedador zeneral Contarini scrive in consonantia etc.

Fo chiamato quelli manchava venir a imprestar, et molti non risposeno, *ita* che si trovò poco: Sier Alvise da Molin lire 10, sier Alvise Foscarei qu. sier Nicolò lire 10 etc.

Fu posto, per li savii, una parte che tutti quelli hanno imprestado eri et vorano imprestar di novo, e quelli sarano chiamati a prestar, possino *etiam* scontar dito imprestado oltra le angarie con ogni sorta di daciai, *ut in parte*. Fu presa.

Fu posto, per li diti, che *alias* fo electo li tre procuratori sier Antonio Trun, sier Tomà Mozenigo e sier Antonio Grimani a exortar li debitori a pagar quanto sono debiti; cussì al presente, per esser ussido sier Antonio Grimani, qual intrò savio dil Consejo, sia electo in loco suo, et a questi *etiam* sia comesso debano mandar per brigate e dimandare imprestado, come faria il Principe; con altre clause, *ut in parte*; e fu presa.

Fu posto, per li ditti, che al signor Zuan Antonio Orsino, fo fiol dil ducha di Gravina, qual era locotenente di la compagnia dil signor Renzo, e fu preso nel fato d'arme a Vizenza, et è stà riseatà e si ritrova a Crema; che al dito li sia dà conduta di homeni d'arme 50, e in questo mezo habbi quelli sono a Padoa dil dito capitano, ch'è 40, al suo governo con la provision, *ut in parte*. Fu presa.

Fu posto, per li diti, una letera a Crema al signor capitano di le fantarie electo governador nostro, confortandolo a star costante con quelle zente et fidelissimi nostri, et che li mandemo danari, nè li semo per manchar, e presto verà il Cristianissimo qual 190\* ne darà tutto il nostro Stado, et non saremo immemori de chi ni harà servito in tanto bisogno e stato a pericolo di la peste, ch'è li in quella terra, et con altre parole; e fu presa. Et simile si scrive a sier Bortolo Contarini capitano et provedador de li, et se li manderà ducati 2000 per pagar quelle zente.

Noto. In Crema è gran morbo e carestia; il vin val lire 10 la quarta: l'ojò lire una; il sal soldi 8. Di biava è pur buon mercado, e dil resto carestia.

Fu posto, per tutti li savii, che domino Andrea Mauresi cavalier, capo di stratioti, vadi in Cypro al governo di quelli stratioti, con provision di ducati 20 per paga a raxon di page 8 a l'anno, *ut in parte*, E meni con sì 15 stratioti di qui. Presa. Ave 12 di no, 132 de sì.

Fu posto, per li savii ai ordeni e provedadori di comun, certa parte, che le carisee e stagni, veniva di Ponente, qual pagava di datio certa quantità, ora sia sminuito il datio, *ut in parte*; e fu presa. Ave 6 di no.

Fu provà, prima li do patroni a Baruto, sier Zuan Contarini di sier Marco Antonio qu. sier Alvise, e sier Beneto Bernardo qu. sier Beneto, et rimaseno. Ave 54 di no.

Et licentiatò il Pregadi, restò Consejo di X con la zonta.

A dì 9, Domenega. Il Principe pur non fo in Colegio.

Di campo, di le Brentelle, di eri sera. Come i nimici al solito alozamento hanno mandato 100 cara di formento a Lignago con una grossa scorta di cavali e fanti; tien sia per far far farine per il campo. *Item*, per uno corvato nostro, seampò di là, fo menati i nimici e preso le nostre sentinelle e scolte, adeo li fanti erano a la guarda altra eridono *Arme, Arme*, sichè il campo fo a l'arme, et tutti a le so' poste e bandiere et con volonteroso animo, che piacquo molto a lui capitano. *Item*, che questa note il